

SEBASTOPOLIS Ptol. ibid. vulgò *Susas*. *Gregorius* huius sedis Episcopus subscripsit eidem epistolæ Synodali.

NICOPOLIS Ptol. lib. 5. cap. 7. vulgò *Gianich* teste Castaldo, & alijs *Chiorne*. *Ioannis* Nicopolitani Præfulis subscriptio habetur in Concilio Chalcedonensi, & in eadem epistola Synodali.

SATALA Ptol. ibid. *Euthius* Satalæ Episcopus subscripsit Concilio Nicæno primo, & *Epiphanius* Ataleni, pro Sataleni, eidem epistolæ.

BERISSE Notitijs antiquis Græcis. *Maxentius* Barissaræ pro *Berisses* Episcopus subscripsit eidem epistolæ Synodali ad Leonem.

## ARMENIA SECUNDA.

MELITENE Ptol. lib. 5. cap. 7. vulgò *Malatia* teste Nigro. *Letoium* huius Episcopum habet Theodoretus lib. 4. cap. 10. & *Otreium* Socrates lib. 5. cap. 8. *Constantinus* vero Melitenæ Metropolis Armeniæ dicitur in Concilio Chalcedonensi.

ARCA Antonino in Itiner. *Lucianus* Arcorum Episcopus subscripsit Concilio Antiocheno apud Socratem lib. 3. hist. Eccles. cap. 21. & *Ioannes* epistolæ Synodali huius Prouinciæ ad Leonem Imperatorem.

COMANA Anton. ibid. vulgò *Arminacha*. *Zotici* Comanensis Episcopi meminit Eusebius lib. 5. hist. Eccles. cap. 15. & *Leontij* Socrates lib. 3. cap. 21. subscripsit etiam *Theodorus* Comanensium Armeniæ secundæ Præful Collationi 8. Synodi quintæ generalis.

ARABYSSVS Anton. ibid. *Oterius* huius sedis Antistes subscripsit Concilio Constantinopol. primo, & *Adelphius* epistolæ Leonis Imp. ad Anatholium Constantinop. parte 3. Concilij Chalcedonensis.

COCVSVM Anton. ibid. *Domnus* huius Episcopus Concilio Chalcedonensi, & *Ioannes* quintæ Synodo generali subscripserunt.

ARIARATHIA Anton. ibidem. *Adelphius*, qui Arabiæ dicitur in Epistola huius prouinciæ ad Leonem, Ariarathiæ potius fuit, cum Arabia ibi non extet; & *Acacij* huius sedis Episcopi mentio fit apud Euagrium lib. 2. hist. Eccles. cap. 18. Sed huius plurimumq; aliarum situs cum Ptole. non conuenit.

AMASA Concilio Nicæno primo, cui *Eutichianus* Amasæus Antistes interfuit.

ZELONA libro Conciliorum. *Heraclius* Zelonensis in Armenia Episcopus Concilio Nicæno primo subscriptus legitur.

SOPHENE item lib. Conciliorum. *Arsaphius*. *Sophenensis* subscripsit eidem Concilio Nicæno primo.

DIOSPONTVM eidem libro Concil. *Acrates*, qui & alijs *Aristeus*, *Diosponti* Episcopus in eodem Concilio Nicæno primo habetur.

## GALATIA PRIMA.

ANCYRA Ptolem. libro 5. cap. 4. vulgò *Anguri*, & Turcis *Enguri* teste Leunclauio: Metropolis Galatiæ dicitur apud Theodoretum lib. 2. cap. 7. *Basilij* huius Episcopi memoria est apud Sozom. lib. 3. cap. ultimo.